

2021


# TUARASCÁIL BHLIANTÚIL

# Misean

Rannchuidiú le timpeallacht rialála láidir a bheith ag Éirinn i réimse an ghnó, trí mhaoirseacht a dhéanamh ar thuirisciú airgeadais agus iniúchóireacht agus rialáil éifeachtach ardcháilíochta i leith ghairm na cuntasáíochta chun leas an phobail, agus an méid sin a chur chun cinn



## Ar gCuid Luachanna



# STRAITÉISÍ

## SNÁITHE 1 Rialáil

**STRAITÉIS 1:** Formhaoirseacht ar ghairm na cuntasaíochta

**STRAITÉIS 2:** Athbhreithniú ar an tuairiscíú airgeadais

**STRAITÉIS 3:** Cigireacht dhíreach ar iniúchóirí ELPanna

**STRAITÉIS 4:** Imscrúdú agus Fiosrúchán



## SNÁITHE 2 Ardchaighdeán a chur chun cinn

**STRAITÉIS 1:** CILInna (Éire) agus treoir ghaolmhar a fhorbairt

**STRAITÉIS 2:** Tacú le comhlachtaí cuntasaíochta agus a bhfreagrachtaí rialála á nglacadh orthu féin

**STRAITÉIS 3:** Tacú le hardchaighdeán maidir leis an tuairiscíú airgeadais

**STRAITÉIS 4:** Tacú le hardchaighdeán maidir le ELPanna a iniúchadh

**STRAITÉIS 5:** Dea-chleachtais a scaipeadh



## SNÁITHE 3 Ár dtionchar a uasmhéadú

**STRAITÉIS 1:** Úsáid éifeachtúil ár n-acmhainní airgeadais a áirithiú

**STRAITÉIS 2:** Éisteacht a fháil

**STRAITÉIS 3:** Ár bpróisis a fhorbairt/a fheabhsú

**STRAITÉIS 4:** Nuálaíocht



### Snáithe 1: Rialáil

Maoirseacht ar Ghairm na hIniúchóireachta agus na Cuntasaíochta

Maoirseacht ar Cháilíocht an Tuairiscithe Airgeadais

Maoirseacht ar Cháilíocht Iniúchóireachta d'Iniúchtaí ELP

Forfheidhmiú

### Snáithe 2: Ardchaighdeán a chur chun cinn

Caighdeán agus Beartas

Maoirseacht ar Ghairm na hIniúchóireachta agus na Cuntasaíochta

Maoirseacht ar Cháilíocht an Tuairiscithe Airgeadais

Maoirseacht ar Cháilíocht Iniúchóireachta d'Iniúchtaí ELP

Forfheidhmiú

Airgeadas agus Riarachán

### Snáithe 3: Ár dtionchar a uasmhéadú

Caighdeán agus Beartas

Maoirseacht ar Ghairm na hIniúchóireachta agus na Cuntasaíochta

Maoirseacht ar Cháilíocht an Tuairiscithe Airgeadais


Maoirseacht ar Cháilíocht Iniúchóireachta d'Iniúchtaí ELP

Forfheidhmiú


Airgeadas agus Riarachán

Forbairt Eagraíochtúil

# Fúinne



# BUAICPHOINTÍ NA BLIANA 2021



# Caibidil 2

---

CAIGHDEÁIN  
AGUS BEARTAS

---

# Caibidil 2: Caighdeáin Agus Beartas



## 1. Príomhfheidhmeanna

Is iad príomhfheidhmeanna an Aonaid Caighdeán agus Beartais:

- caighdeáin iniúchóireachta, eiticíúla, agus rialaithe cáilíochta a ghlacadh maidir le hiniúchóireacht reachtúil in Éirinn
- cibé treoir agus caighdeáin dearbhaithe a eisiúint a mheasann an tÚdarás is cuí
- rannchuidiú le forbairt bheartas an Údarás ar ábhair rialála agus eile

## 2. Forbairtí suntasacha

Ghlac ÚMICÉ ceithre Chaighdeán Idirnáisiúnta athbhreithnithe maidir le hiniúchóireacht (Éire) le linn na bliana, chomh maith le leasuithe comhlíontachta gaolmhara. Orthu sin bhí:

- Caighdeán Idirnáisiúnta um Bainistíocht Cáilíochta (ISQM) (Éire) 1 – *Quality Management for Firms that Perform Audits or Reviews of Financial Statements, or Other Assurance or Related Services Engagements* [Rialú Cáilíochta do Ghnólachtaí a Fheidhmíonn Iniúchtaí agus Athbhreithnithe ar Ráitis Airgeadais, nó Fostaíochtaí Dearbhaithe nó Seirbhísí Gaolmhara Eile]; agus
- Caighdeán Idirnáisiúnta Iniúchóireachta (ISA) (Éire) 240 – *The Auditor's Responsibilities Relating to Fraud in an Audit of Financial Statements* [Freagrachtaí an Iniúchóra a Bhaineann le Calaois in Iniúchadh ar Ráitis Airgeadais].

Leagtar amach in Aguisín 5 liosta iomlán de na caighdeáin athbhreithnithe a eisíodh le linn na bliana.

In 2021, ghlac ÚMICÉ Caighdeán Idirnáisiúnta maidir le Fostaíochtaí Athbhreithnithe (ISRE) (Éire) 2410 – *Review of Interim Financial Information Performed by the Independent Auditor of the Entity* [Athbhreithniú ar Fhaisnéis Airgeadais Eatramhach arna dhéanamh ag Iniúchóir Neamhspleách an Eintitis]. Is caighdeán dearbhaithe é sin arna oiriúnú d'iniúchóirí Éireannacha atá ag déanamh athbhreithnithe ar ráitis airgeadais eatramhacha arna dtáirgeadh ag eintitis atá liostaithe ar stocmhalartán na hÉireann. Tá feidhm ag an gcaighdeán nua maidir le hiniúchtaí ar ráitis airgeadais eatramhacha i leith na dtréimhsí dar tús an 15 Nollaig 2021 nó ina dhiaidh sin, agus tá glacadh luath ceadaithe.

Mar chomhlánú ar pháipéir chomhairliúcháin agus aiseolais a bhaineann le caighdeáin iniúchóireachta agus dearbhaithe a eisíodh i rith na bliana, tháirg ÚMICÉ cuir i láthair ghearra agus físeáin faisnéise. Is é is cuspóir leo forléargas a thabhairt d'úsáideoirí ar na topaicí a chlúdaítear agus iad a spreagadh chun dul i ngleic níos mó leo trí rochtain a fháil ar na doiciméid iomlána ar shuíomh gréasáin ÚMICÉ.

D'eisigh ÚMICÉ treoirlínte do na CCAnna maidir le hoideachas leanúnach d'iniúchóirí reachtúla chomh maith lena bhfeidhmeanna imscrúdaithe agus araíonachta. Soiléirítear sna treoirlínte na hionchais atá ag ÚMICÉ sna réimsí sin, agus is é is cuspóir leo feabhas a chur ar chur chuige na CCAnna i leith a bhfeidhmeanna rialála agus ar an gcomhsheasmhacht ina measc. Tá na treoirlínte ar fáil ar shuíomh gréasáin ÚMICÉ sa rannán ([Oversight of the Profession](#)) agus beidh feidhm acu ón 1 Eanáir 2022.

I rith 2021, lean ÚMICÉ ar aghaidh ag dul i gcomhairle go gníomhach le piaraí, geallsealbhóirí agus socraitheoirí caighdeán. Áirítear ar ghníomhaíochtaí den sórt sin breathnóireacht a dhéanamh ag cruinnithe Ghrúpa Comhairleach Teicniúil FRC, rannchuidiú le freagairt CCEFI ar roinnt comhairliúcháin idirnáisiúnta maidir le caighdeáin atá beartaithe, agus a

litreacha tráchta féin a eisiúint i ndáil le caighdeáin atá beartaithe, nuair is iomchuí. Ina theannta sin, d'eagraigh ÚMICÉ imeacht for-rochtana ar ar fheastail na CCAnna agus gnólachtaí iniúchóireachta agus ag ar thug ionadaithe ón mBord Idirnáisiúnta um Chaighdeáin Iniúchóireachta agus Dearbhaithe (IAASB) forléargas ar an gcaighdeán iniúchóireachta idirnáisiúnta atá beartaithe i leith eintitis nach bhfuil a oiread castachta ag baint leo.

Chomh maith leis sin, rannchuidigh an tÚdarás le hobair Ghrúpa Athbhreithnithe an Dlí Cuideachtaí (GADC) (an comhlacht comhairleach neamhspleách don Roinn maidir le hábhair a bhaineann le dlí na gcuideachtaí) trí chomhaltas an Phríomhfheidhmeannaigh.

### Caighdeáin Bainistíochta Cáilíochta

Chun féachaint chuige gur córais láidre atá ag na gnólachtaí iniúchóireachta agus go dtacaíonn na córais sin go héifeachtach le hiniúchtaí ardchaighdeáin, in 2021 ghlac ÚMICÉ trí chaighdeán idirghaolmhara lena dtugtar aghaidh ar chórais bhainistíochta cáilíochta na ngnólachtaí.

Is iad na caighdeáin nua, a bheidh i bhfeidhm an 15 Nollaig 2022:

- ISQM (Éire) 1 (mar a thuairiscítear thuas), lena dtugtar isteach cur chuige nua rioscabhunaithe faoina gceanglaítear ar ghnólacht dearadh, cur chun feidhme agus feidhmiú a chórais bainistíochta cáilíochta a shaincheapadh ar bhonn chineál agus imthosca an ghnólachta agus bhfostaíochtaí a dhéanann sé. Déileáiltear sa chaighdeán freisin le freagracht an ghnólachta i leith beartais nó nósanna imeachta i ndáil le fostaíochtaí atá faoi réir athbhreithnithe ar a gcáilíocht.
- ISQM (Éire) 2 – *Engagement Quality Reviews* [Athbhreithnithe ar Cháilíocht Fostaíochtaí], ina ndéileáiltear le ceapadh agus le hincháilitheacht an tá a dhéanfaidh athbhreithniú ar cháilíocht fostaíochta, agus le feidhmiú agus doiciméadú an athbhreithnithe ar cháilíocht fostaíochta.
- In ISA (Éire) 220 (arna athbhreithniú Nollaig 2021) – *Quality Management for an Audit of Financial Statements* [Bainistíocht Cáilíochta le haghaidh Iniúchadh ar Ráitis Airgeadais], déileáiltear le sainfheagrachtaí an iniúchóra i ndáil le bainistíocht cáilíochta maidir le hiniúchadh ar ráitis airgeadais agus le freagrachtaí gaolmhara an chomhpháirtí fostaíochta.

Beidh feidhm ag na caighdeáin nua agus na cinn athbhreithnithe sin maidir le fostaíochtaí iniúchóireachta agus fostaíochtaí dearbhaithe araon. Fágfaidh siad go neartófar cur chuige na ngnólachtaí maidir le bainistíocht cáilíochta agus beartaítear go mbeidh na nithe seo a leanas mar thoradh orthu:

- córas éifeachtach bainistíochta cáilíochta i ngnólacht, lena leagtar síos an bhunchloch i gcomhair cháilíocht chomhsheasmhach na bhfostaíochtaí.
- freagairt réamhghníomhach ón ngnólacht ar chúinsí athraitheacha agus rioscaí a bhainistíú nó a mhaolú go réamhghníomhach, agus feabhsú agus freagrúlacht leanúnach a chur chun cinn.
- béim níos mó ar fhaireachán a dhéanamh ar an gcórais ina iomláine, agus ar fheabhsúchán tráthúil, éifeachtach.
- comhtháthú feabhsaithe na gcomhpháirteanna den chóras bainistíochta cáilíochta.

### 3. Straitéisí agus torthaí a eascraíonn as an bplean gnó

Straitéisí an phlean gnó	Torthaí
<b>Forbairt CIlInna (Éire) agus treoracha gaolmhara</b>	<ul style="list-style-type: none"><li>→ Glacadh ceithre cinn athbheithnithe de Chaighdeáin Idirnáisiúnta Iniúchóireachta (Éire), leasuithe comhlíontachta gaolmhara agus Gluais Téarmaí athbheithnithe</li><li>→ Eísíodh ISRE (Éire) 2410 le haghaidh iniúchóirí a dhéanann athbheithnithe ar fhaisnéis airgeadais eatramhach</li><li>→ Óstáladh ceithre chruinniú de chuid an Phainéil um Chomhairle Theicniúil le linn na bliana. Chomh maith leis sin, chuir meitheal tacaíocht ar fáil maidir le caighdeán dearbhaithe a fhorbairt</li></ul>
<b>Tacú le hardchaighdeáin maidir le ELPanna a iniúchadh</b>	<ul style="list-style-type: none"><li>→ Rinneadh faireachán ar fhorbairtí maidir le caighdeáin iniúchóireachta idirnáisiúnta agus cinn de chuid na Ríochta Aontaithe, lena n-áirítear trí fhreastal ar chruinnithe de chuid Ghrúpa FRC um Chomhairle Theicniúil agus trí rannpháirtíocht i bhFoghrúpa CCEFI um Chaighdeáin Iniúchóireachta Idirnáisiúnta</li><li>→ Eísíodh treoirlínte do na CCAnna maidir le hoideachas leanúnach d'iniúchóirí reachtúla a rialáil, a fhorfheidhmiú agus faireachán a dhéanamh air agus maidir lena bhfeidhmeanna imscrúdaithe agus araíonachta</li></ul>
<b>Scaipeadh an dea-chleachtais</b>	
<b>Éisteacht a fháil</b>	<ul style="list-style-type: none"><li>→ Eísíodh trí chomhairliúchán le linn na bliana a bhaineann le hathbheithnithe ar an gcreat iniúchóireachta. Sular eísíodh na comhairliúcháin, chuaigh ÚMICÉ i mbun plé lena Phainéal um Chomhairle Theicniúil agus, i gcás inarb ábhartha, le comhlachtaí rialála eile</li><li>→ Glacadh páirt i bhFoghrúpa CCEFI um Chaighdeáin Iniúchóireachta Idirnáisiúnta, lena n-áirítear glaonna comhdhála tréimhsiúla agus na cruinnithe bliantúla leis na boird a shocraíonn caighdeáin idirnáisiúnta (IAASB agus IESBA) agus leis an mBord um Fhormhaoirseacht ar mhaithe le Leas an Phobail</li><li>→ Rannchuidíodh le forbairt fhreagraí CCEFI ar chomhairliúcháin i leith iniúchóireachta a d'eisigh IAASB, IESBA agus an Coimisiún Eorpach</li><li>→ Cuireadh isteach freagra amháin ó ÚMICÉ ar chomhairliúchán de chuid IAASB agus dhá fhreagra uaidh ar chomhairliúchán de chuid IESBA</li><li>→ Eagraíodh imeacht for-rochtana de chuid IAASB ar ar fhreastail na CCAnna agus na gnólachtaí iniúchóireachta chun plé a dhéanamh ar an gcaighdeán iniúchóireachta idirnáisiúnta atá beartaithe i leith eintitis nach bhfuil a oiread castachta ag baint leo</li></ul>



# Caibidil 3

---

MAOIRSEACHT  
AR GHAIM NA  
hINIÚCHÓIREACHTA  
AGUS NA  
CUNTASAÍOCHTA

---

# Caibidil 3: Maoirseacht Ar Ghairm Na Hiniúcháireachta Agus Na Cuntasaíochta



## 1. Príomhfheidhmeanna

Is iad príomhfheidhmeanna an Aonaid Maoirseachta Rialála agus Faireachán:

- maoirsiú a dhéanamh ar an mbealach a rialaíonn na CCFanna a gcuid comhaltaí, lena n-áirítear feidhmiú a bpróiseas imscrúdaithe agus araíonachta
- maoirsiú a dhéanamh ar an gcaoi a ndéanann na CCAnna na feidhmeanna seo a leanas a chomhlíonadh maidir leis na hiniúcháirí reachtúla agus na gnólachtaí iniúcháireachta atá formheasta agus cláraithe acu faoin Acht:
- formheas agus clárú
- oideachas leanúnach
- córais dearbhaithe cáilíochta agus
- córais araíonachta imscrúdaithe agus riaracháin
- comhoibriú lena gcomheagraíochtaí san Aontas Eorpach agus i dtíortha eile agus le húdaráis eile sa tír seo agus san Aontas Eorpach
- comhairle a chur ar an Aire maidir le hábhair a bhaineann le gairm na cuntasaíochta

## 2. Significant developments

I rith 2021, rinne dhá CCA iarratas chuig ÚMICÉ ar a n-aitheantas a chúlghairm. Faoi alt 931 den Acht, chinn ÚMICÉ a haitheantas a chúlghairm i gcás Institiúid na gCuntasóirí Cairte i Sasana agus sa Bhreatain Bheag (ICAEW) le héifeacht ón 21 Iúil 2021 agus i gcás Institiúid na gCuntasóirí Cairte in Albain (ICAS) le héifeacht ón 22 Nollaig 2021. De bhua cúlghairm aitheantais i gcás ICAEW agus ICAS, ní comhlachtaí cuntasaíochta forordaithe faoin Acht iad na hinstiúidí sin a thuilleadh agus mar sin ní thagann siad faoi shainchúram ÚMICÉ a thuilleadh. Tá liosta in Aguisín 3 de na CCFanna atá in Éirinn faoi láthair, a mbíonn cuid acu ag feidhmiú in Éirinn agus sa Ríocht Aontaithe araon.

Thug an tÚdarás faoi chuairt mhaoirseachta amháin in 2021, cuairt a bhain le dearbhú cáilíochta. Eisíodh roinnt tuarascálacha maoirseachta le linn 2021, lena n-áirítear tuarascáil dearbhaithe cáilíochta, tuarascáil mhaoirseachta maidir le nósanna imeachta imscrúdaithe agus araíonachta agus tuarascáil a bhaineann le ceadúnú. Ina theannta sin, chuir an fhoireann bailchríoch ar an gcur chuige i leith na rialála ar na CCFanna, agus béim á leagan aige ar acmhainní a ailíniú leis na feidhmeanna reachtacha chun díriú ar an gcur chuige rialála is éifeachtúla.

Ina theannta sin, d'eisigh an tÚdarás treoirínite maidir le hoideachas leanúnach agus feidhmeanna imscrúdaithe araíonachta agus d'eisigh sé comhairliúchán maidir le leasuithe a bheartaítear a dhéanamh ar na treoirínite i ndáil le diolúine.

## Aitheantas a Chúlghairm

Lean an tÚdarás ar aghaidh ag plé le gach CCA maidir le ceanglais rialála tar éis an Bhreiteimeachta. D'fhág an Breiteimeacht go raibh roinnt dúshlán le sárú i leith na samhla dé-aitheantais idir Éire agus an Ríocht Aontaithe. Mar shampla, ceanglas amháin faoi dhlí na hÉireann is ea go gcaithfidh iniúcháirí cuid mhór dá n-oiliúint phraiticiúil a dhéanamh in iniúchtaí a cheanglaítear a dhéanamh faoi dhlí an Aontais Eorpaigh. Mar sin, níor cuireadh iniúchadh ar chuideachtaí sa Ríocht Aontaithe san áireamh leis an gceanglas sin a thuilleadh tar éis an Bhreiteimeachta. Mar thoradh ar dhul i gcomhairle linn maidir leis sin agus maidir le saincheisteanna eile a tháinig chun cinn mar gheall ar an mBreiteimeacht, chinn dhá CCA iarratas a dhéanamh ar a n-aitheantas a chúlghairm agus rinneadh é sin i rith na bliana.

### 3. Straitéisí agus torthaí a eascraíonn as an bplean gnó

Straitéisí an phlean gnó	Torthaí
<b>Formhaoirseacht ar ghairm na cuntasáíochta</b>	<ul style="list-style-type: none"><li>→ Rinneadh bainistíocht ar chúlghairm éifeachtach a dhéanamh ar aitheantas ICAEW agus ICAS</li><li>→ Tugadh faoi rannpháirtíocht mhaoirseachta leanúnach trí chruinnithe athbhreithnithe, trí athbhreithniú ar phleananna rialála, trí thuaisceáin bhliantúla, agus trí thuarascálacha bliantúla/rialála</li><li>→ Rinneadh breithniú agus moladh i dtaobh 44 baisc doiciméad bunreachtúil a fhorhmeas</li></ul>
<b>Tacú le comhlachtaí cuntasáíochta maidir lena bhfreagrachtaí rialála a chomhlíonadh</b>	<ul style="list-style-type: none"><li>→ Tugadh faoi fhostaíocht rialta maoirseachta leis na BCPanna go léir</li><li>→ Reáchtáladh cruinniú comhchéime bliantúil lena n-áirítear cuir i láthair ó na haonaid ábhartha in ÚMICÉ agus cur i láthair ó CCF</li></ul>
<b>Scaipeadh an dea-chleachtais</b>	<ul style="list-style-type: none"><li>→ Soláthraíodh aiseolas do CCAnna maidir lena bpleananna feidhmithe i dtaobh treoirlínte a chomhlíonadh i ndáil le hoideachas leanúnach agus gnóthaí imscrúdaithe agus araíonachta</li><li>→ Eisíodh Próifíl na Gairme, ina soláthraítear sonraí staitistiúla ar ghairm na cuntasáíochta agus na hiniúcháireachta</li><li>→ Cuireadh tús le hathbhreithniú téamach ar 'céard is dea-cháil ann'</li></ul>
<b>Éisteacht a fháil</b>	<ul style="list-style-type: none"><li>→ Chuathas i gcomhairle le geallsealbhóirí ábhartha lena n-áirítear an Roinn, an Oifig um Chlárú Cuideachtaí agus FRC maidir le cúrsaí maoirseachta</li><li>→ Rinneadh cur i láthair ag imeacht ballraíochta de chuid CCF</li></ul>
<b>Ár bpróisis a fhorbairt/a fheabhsú</b>	<ul style="list-style-type: none"><li>→ Rinneadh tuilleadh mionchoigeartuithe ar an gcur chuige maoirseachta maidir le formhaoirseacht agus maoirseacht a dhéanamh ar CCFanna</li></ul>

# Caibidil 4

---

MAOIRSEACHT AR  
CHÁILÍOCHT AN  
TUAIRISCITHE  
AIRGEADAIS

---

# Caibidil 4: Maoirseacht Ar Cháilíocht An Tuairiscithe Airgeadais



## 1. Príomhfheidhmeanna

Is iad príomhfheidhmeanna an Aonaid Maoirseachta um Thuairisciú Airgeadais:

- scrúdú a dhéanamh ar na tuarascálacha airgeadais bliantúla agus leathbhliantúla de chuid eintitis liostaithe áirithe agus gníomhartha forfheidhmiúcháin a dhéanamh nuair a bhraitear cásanna neamhchomhlíontachta
- comhoibriú le forfheidhmitheoirí cuntasáíochta de chuid an Aontais Eorpaigh
- comhoibriú chun caighdeán um thuairisciú airgeadais a fhorbairt; agus
- comhairle a chur ar an Aire faoi ábhair chuntasaíochta

## 2. Forbairtí suntasacha

In 2021, rinne an tÚdarás scrúdú ar 43 tuarascáil airgeadais, arbh éard a bhí iontu 37 tuarascáil airgeadais bhliantúil agus sé tuarascáil airgeadais leathbhliantúla (féach Aguisín 2). Sholáthair 19 n-eisitheoir 86 gealltanais don Údarás chun an tuairisciú a fheabhsú i dtréimhsí sa todhchaí. An réimse ba mhinice inar soláthraíodh gealltanais, bhain sé le nochtadh ionstraimí airgeadais. I measc na réimsí eile ar tugadh gealltanais ina leith bhí tuairisciú agus cur i láthair ráiteas airgeadais, bearta feidhmíochta malartacha, nochtadh deighleog oibriúcháin, bearnú agus tomhas cóirluacha.

Ina theannta sin, d'fhoilsigh an tÚdarás nóta faisnéise ar [IAS 36 Impairment of Assets](#) [Lagú Sócmhainní].

Lean an tÚdarás ar aghaidh leis na pléití iomadúla lena chomheagraíochtaí Eorpacha, agus ghlac sé páirt i roinnt tascfhórsaí agus foghrúpaí atá bainteach le forfheidhmiú i réimse na cuntasáíochta. Le linn na bliana, bhí aird na ngrúpaí sin fós dírithe ar COVID-19 agus ar forbairtí a dhéanfar amach anseo sa tuairisciú corparáideach, lena n-áirítear an Fhormáid Leictreonach Aonair Eorpach agus an tuairisciú neamhairgeadais, go háirithe an tuairisciú ar inbhuanaitheacht chorparáideach

## Lagú – tionchar COVID-19

Scrúdaigh an tÚdarás ráitis airgeadais bhliantúla eisitheora san earnáil fáilteachais agus iompair, ar imríodh tionchar mór air de bharr shrianta taistil COVID-19 agus de bharr rialacha maidir le scaradh sóisialta. Rinne an tÚdarás measúnú ar cibé an raibh nó nach raibh aon léiriú ann ag an dáta tuairiscithe go bhféadfadh lagú a bheith ar shócmhainn i gcúinsí ina raibh tionchar mór ag COVID-19 ar oibríochtaí an eisitheora, agus thug sé ar aird nach raibh athbhreithniú déanta ag an eisitheoir i ndáil le lagú.

Chinn ÚMICÉ gur léiriú láidir é tionchar shrianta taistil COVID-19 gur tionscnaíodh ceann amháin nó níos mó de na táscairí lagaithe in IAS 36 Impairment of Assets [Lagú Sócmhainní] i gcás an eisitheora le linn 2020.

Chinn ÚMICÉ freisin gur táscairí lena léirítear lagú a bhí sa mhéid seo a leanas agus go raibh siad inaitheanta amhail an 31 Nollaig 2020:

- (a) tarraingíodh ártach amháin ó fhílín an eisitheora siar go sealadach ó sheirbhís in 2020
- (b) is cosúil gur fhág an laghdú ar ioncam agus ar thuilleamh mar thoradh ar shrianta taistil COVID-19 agus rialacha maidir le scaradh sóisialta gur imríodh ar an margadh agus ar na cúinsí eacnamaíocha ina bhfeidhmíonn an t-eisitheoir [IAS 36.12(b)]; agus
- (c) bhí srianta taistil agus rialacha maidir le scaradh sóisialta arna bhforchur ag Rialtas na hÉireann fós i bhfeidhm go dtí dáta formheasa na ráiteas airgeadais bliantúil [IAS 36.12(b)].

I measc na dtosca a measadh a bheith ábhartha i gcomhthéacs táscairí lena léirítear lagú a shainithint, bhí an fhíríc gur shonraigh an t-eisitheoir sa réamhfhógra uaidh a foilsíodh i Ráithe 1 2021 go raibh tionchar fós ag srianta taistil COVID-19 ar na cúinsí eacnamaíocha ina mbíonn sé ag feidhmiú.

Tar éis na fostaíochta le ÚMICÉ, sholáthair an t-eisitheoir roinnt gealltanais do ÚMICÉ ar bhonn deonach, lena n-áirítear an nochtadh maidir le lagú a leathnú ina ráitis airgeadais bhliantúla i leith 2021 chun na nithe seo a leanas a áireamh:

- (a) míniú go raibh roinnt táscairí lena léirítear lagú i láthair an 31 Nollaig 2020; agus
- (b) ráiteas sainráite go bhfuarthas amach sa tástáil a rinneadh maidir le lagú nach raibh gá le muirear lagaithe amhail an 31 Nollaig 2020;

Gheall an t-eisitheoir freisin measúnú a dhéanamh lena shainithint an raibh aon táscairí lena léirítear lagú ann amhail an 31 Nollaig 2021.

## 2. Straitéisí agus torthaí a eascraíonn as an bplean gnó

Straitéisí an phlean gnó	Torthaí
<b>Athbhreithniú ar an tuairisciú airgeadais</b>	<ul style="list-style-type: none"><li>→ Scrúdaíodh 37 tuarascáil bhliantúil</li><li>→ Scrúdaíodh sé thuarascáil leathbhliantúla</li></ul>
<b>Tacú le hardchaighdeáin sa tuairisciú airgeadais</b>	<ul style="list-style-type: none"><li>→ Glacadh páirt ghníomhach i roinnt fóraim, foghrúpaí agus tascfhórsaí Eorpacha, lena n-áirítear an Buanchoiste um Thuairisciú Corparáideach, an Mheitheal um Thuairisciú Inste agus Tascfhórsa na nInstitiúidí Airgeadais</li><li>→ Glacadh páirt, leis an Roinn, sa Choiste Rialaithe Cuntasaíochta a thugann a thuairim don Choimisiún Eorpach ar thograí lena nglactar IFRSanna</li></ul>
<b>Scaipeadh an dea-chleachtais</b>	<ul style="list-style-type: none"><li>→ Foilsíodh coimre de chúig chinneadh tuairiscithe airgeadais</li></ul>
<b>Éisteacht a fháil</b>	<ul style="list-style-type: none"><li>→ Foilsíodh Nóta Faisnéise amháin – IAS 36 Impairment of Assets [Lagú Sócmhainn]</li><li>→ Rinne sé cur i láthair do ghnólachtaí iniúchóireachta, do chomhlachtaí tionscail agus do gheallsealbhóirí eile ar thuairimí agus ar thosaíochtaí de chuid an Aonaid um Maoirseacht ar Thuairisciú Airgeadais</li></ul>
<b>Ár bpróisis a fhorbairt agus a fheabhsú</b>	<ul style="list-style-type: none"><li>→ Rinneadh faireachán ar fhorbairtí ar an bhforfheidhmiú i réimse na cuntasaíochta ar fud an domhain agus breithníodh an tionchar féideartha ar chóras scrúdaithe tuairiscithe airgeadais ÚMICÉpotential impact on IAASA's system of examination of financial reporting</li></ul>

# Caibidil 5

---

MAOIRSEACHT AR  
INIÚCHTAÍ AR  
EINTTIS LEASA  
PHOIBLÍ

---

# Caibidil 5: Maoirseacht Ar Iniúchtaí Ar Eintis Leasa Phoiblí



## 1. Príomhfheidhmeanna

Tá Aonad ÚMICÉ um Cháilíocht Iniúcháireachta freagrach as athbhreithniú dearbhaithhe cáilíochta ar iniúcháirí reachtúla agus gnólachtaí iniúcháireachta a dhéanann iniúchtaí reachtúla ar eintitis leasa phoiblí (ELPanna) in Éirinn.

Trí phríomhfheidhm atá ag an Aonad um Cháilíocht Iniúcháireachta:

- Cigireachtaí a dhéanamh ar ghnólachtaí iniúcháireachta a dhéanann iniúchtaí reachtúla ar ELPanna
- Comhoibriú le comhlachtaí de chuid an Aontais Eorpaigh um maoirseacht iniúcháireachta
- Comhairle a chur ar an Aire Fiontar, Trádála agus Fostaíochta faoi ábhair iniúcháireachta

## Forbairtí suntasacha

### Cigireacht ar chomhlachtaí a dhéanann iniúcháireacht ar ELPanna

In 2021, rinne ÚMICÉ a cheathrú babhta cigireachtaí ar sheacht gcinn de na gnólachtaí a dhéanann iniúcháireacht ar ELPanna. Rinne ÚMICÉ cigireacht ar chúig réimse rialaithe inmheánaigh sna gnólachtaí sin:

Ba iad na réimsí a ndearnadh cigireacht orthu:

- comhairliúchán
- faireachán inmheánach
- modheolaíocht
- athbhreithnithe rialaithe cáilíochta eile
- oiliúint

Mar chuid dá cheathrú babhta iniúchtaí, rinne ÚMICÉ cigireacht freisin ar shampla de 30 iniúchadh ar ELPanna ar fud na seacht ngnólacht sin. I mí an Mhárta 2022, d'fhoilsigh ÚMICÉ torthaí na gcigireachtaí a rinneadh in 2021 maidir leis na seacht ngnólacht sin a dhéanann iniúcháireacht ar ELPanna agus tá siad le feiceáil ar shuíomh Gréasáin ÚMICÉ [anseo](#).

### Torthaí na gcigireachtaí a rinneadh in 2021

In 2021, ar fud na seacht ngnólacht a dhéanann iniúcháireacht ar ELPanna, luaigh ÚMICÉ torthaí i réimsí na gcomhairliúchán, an faireacháin inmheánaigh, na n-athbhreithnithe eile ar rialú cáilíochta agus na hoiliúna. Bhí déine na dtorthaí ó ÚMICÉ sa raon idir buí (míoneasnamh) agus dearg (móreasnamh).

In 2021, sannadh grád 1 nó 2 do 93% de na hiniúchtaí ar ELPanna a rinne na seacht ngnólacht sin, rud a thugann le fios go raibh cáilíocht an iniúchta ar chaighdeán maith. Ba ghá feabhas a chur ar na hiniúchtaí eile.

### Gnólachtaí a dhéanann iniúchadh ar ELPanna

In 2021, rinne naoi ngnólacht iniúcháireachta iniúchtaí reachtúla ar ELPanna in Éirinn (2020: ocht gcinn). Rinne ceithre cinn de na gnólachtaí sin iniúchadh ar 74% (2020: 76%) de na ELPanna in Éirinn, agus thuill siadsan thart ar 89% (2020: 90%) de na táillí i leith ELPanna a iniúchadh.

I gcás seacht gcinn de na gnólachtaí sin, cuireann ÚMICÉ cigireacht i gcrích agus foilsíonn sé torthaí na hoibre sin.

Maidir leis an ochtú gnólacht, tugadh fógra do ÚMICÉ gur gnólacht é atá ag tosú i mbun iniúcháireacht a dhéanann ar ELPanna. Rinne ÚMICÉ cigireacht ar 14 réimse de chóras rialaithe cáilíochta an ghnólachta sin le linn 2021. Rinne ÚMICÉ cigireacht freisin ar iniúchadh amháin ar ELP a rinne an gnólacht sin. Toisc gurbh é sin an chéad chigireacht a rinne ÚMICÉ ar an ngnólacht, níor foilsíodh torthaí na cigireachta. Ní dhéanann an gnólacht sin iniúchtaí reachtúla a thuilleadh.

I gcás an ghnólachta deiridh, bhí sé ina iniúcháir reachtúil i leith ELP amháin in Éirinn. Bhí an gnólacht sin bunaithe sa Ríocht Aontaithe agus bhí sé faoi réir formhaoirseacht ag údarás inniúil na Ríochta Aontaithe in 2021. Tar éis don ÚMICÉ aitheantas ICAEW a chúilghairm, ní dhéanann an gnólacht sin iniúchtaí reachtúla ar ELPanna a thuilleadh.

### Foilsíú tuarascálacha cigireachta

I mí an Mhárta 2021, d'fhoilsigh ÚMICÉ tuarascálacha cigireachta inar leagadh amach torthaí na gcigireachtaí a rinne ÚMICÉ in 2020 ar sheacht ngnólacht a dhéanann iniúcháireacht ar ELPanna. Tá na tuarascálacha cigireachta sin le feiceáil ar shuíomh Gréasáin ÚMICÉ [andseo](#).

### Rannpháirtíocht idirnáisiúnta

Leanann ÚMICÉ i mbun rannpháirtíocht le piraí ar an leibhéal idirnáisiúnta agus déanann sé athbhreithniú leanúnach ar an rannpháirtíocht sin lena chinntiú go mbainfear barrluach as. In 2021, toghadh ÚMICÉ ar Bhord IFIAR agus ghlac sé páirt in dhá fhoghrúpa freisin. Chuir ÚMICÉ deireadh lena rannpháirtíocht i ngrúpa na Rialtóirí atá ag Teacht Chun Cinn le IFIAR, ar an mbonn go meastar anois gur rialtóir seanbhunaithe é ÚMICÉ.

Ar an leibhéal Eorpach, leanaimid den rannpháirtíocht in CCEFI agus sna foghrúpaí uile. Tá ÚMICÉ ina chathaoirleach ar an bhfoghrúpa um Fhaireachán ar an Margadh le roinnt blianta anuas anois agus tá fógra tugtha do gach páirtí aige go bhfuil sé beartaithe aige éirí ar an gcúram sin in 2022. Ina ionad sin, tá ÚMICÉ ceaptha ina chathaoirleach ar thascfhórsa nua atá dírithe ar oiliúint éifeachtach do chigirí a aithint agus a chomhordú.

### Nósanna imeachta leantacha

In 2021, rinne ÚMICÉ athbhreithniú ar na haighneachtaí go léir a fuarthas ó ghnólachtaí a dhéanann iniúcháireacht ar ELPanna inar míníodh cé na bearta a rinneadh chun moltaí na bliana 2020 ó ÚMICÉ a chur i bhfeidhm, agus lean sé nósanna imeachta leantacha nuair ba ghá sin. Tá ÚMICÉ deimhin de, i gcás na moltaí go léir a rinneadh leis na gnólachtaí sin in 2020, gur cuireadh i bhfeidhm go hiomchuí iad in 2021.

### Comhoibriú ar an leibhéal idirnáisiúnta

Tá ÚMICÉ den tuairim go bhfuil buntábhacht le comhoibriú le rialtóirí iniúcháireachta idirnáisiúnta ionas go mbeidh rath air. Maidir le heintitis agus gnólachtaí a thagann faoi shainchúram ÚMICÉ, ós rud é gur minic a fheidhmíonn siad laistigh de struchtúir dhomhanda, tá sé rithábhachtach go gcomhoibreoidh rialtóirí go héifeachtach le chéile chun eolas



agus taithí a chomhroinnt, agus go mbeidh siad ag feidhmiú ar bhealach comhsheasmhach más féidir. Leis na gníomhaíochtaí sin, rannchuidítear le haidhm na rialtóirí a bhaint amach ó thaobh cur go héifeachtach agus go héifeachtúil le leanúint d'fheabhas a chur ar cháilíocht na hiniúchóireachta. Glacann ÚMICÉ páirt ghníomhach i gCoiste na gComhlachtaí Eorpacha um Fhormhaoirseacht Iniúchóireachta (CCEFI) agus i bhFóram Idirnáisiúnta na Rialálaithe Iniúchóireachta Neamhspleácha (IFIAR).

Tá ionadaithe ag ÚMICÉ ar gach foghrúpa de chuid CCEFI agus ar roinnt tascfhórsaí agus coláistí. Tá Príomhfheidhmeannach ÚMICÉ ar ghrúpa comhairliúcháin CCEFI, grúpa a thacaíonn le Cathaoirleach CCEFI. Tá ÚMICÉ fós ina Chathaoirleach ar Foghrúpa CCEFI um Fhaireachán ar an Margadh. Glacann ÚMICÉ páirt freisin i gceannaireacht Foghrúpa Cigireachta CCEFI, trína Choiste Eagraithe, agus bhí sé ina chathaoirleach ar an gcruinniú a thionól an foghrúpa sin i mí an Mheithimh 2021. Le linn 2021, toghadh ÚMICÉ mar Chathaoirleach ar Thascfhórsa Oiliúna nua an foghrúpa sin.

## Tacú le hardchaighdeáin maidir le ELPanna a iniúchadh

I gcomhréir le straitéis ÚMICÉ i dtaobh éisteacht a fháil, d'eagraigh ÚMICÉ cruinniú faisnéise do choistí iniúchóireachta i mí Dheireadh Fómhair 2021. Imeacht fíorúil a bhí i gceist agus d'fhreastail cuid mhaith coistí air. Áiríodh leis an seisiún faisnéise an t-eolas is déanaí ó ÚMICÉ ar ábhair a bhaineann le comhaltaí an choiste iniúchóireachta agus plé painéil ar thuairisciú iniúchta, ionchas i leith iniúchta agus an tuarascáil bhliantúil. Tá taifeadadh ar an imeacht ar fáil don phobal [anseo](#).

D'fhoilsigh ÚMICÉ páipéar téamach inar pléadh tuairisciú trédhearcachta ag gnólachtaí Éireannacha a dhéanann iniúchóireacht ar ELPanna, agus tá sé le feiceáil [anseo](#). Ina theannta sin, d'fhoilsigh ÚMICÉ páipéar téamach inar pléadh an úsáid a bhaintear as anailísíocht sonraí san iniúchóireacht reachtúil in Éirinn, agus tá sé le feiceáil [anseo](#). D'fhoilsigh ÚMICÉ léargas chigireachta freisin inar leagadh amach príomhtheachtaireachtaí d'iniúcháirí agus iad ag iniúchadh airgead tirim agus coibhéisí airgid thirim, agus tá sé le feiceáil [anseo](#).

## Straitéisí agus torthaí a eascraíonn as an bplean gnó

Straitéisí an phlean gnó	Torthaí
<b>Cigireacht dhíreach ar ghnólachtaí a dhéanann iniúchóireacht ar ELPanna</b>	<ul style="list-style-type: none"> <li>➔ Rinneadh cigireacht ar ocht ngnólacht</li> <li>➔ Rinneadh cigireacht ar 31 iniúchadh ar ELPanna</li> </ul>
<b>Tacú le hardchaighdeáin maidir le ELPanna a iniúchadh</b>	<ul style="list-style-type: none"> <li>➔ Chuathas i gcomhairle go rialta le gach gnólacht a dhéanann iniúchóireacht ar ELPanna</li> <li>➔ Bhí an tÚdarás ina chathaoirleach ar Foghrúpa CCEFI um Fhaireachán ar an Margadh</li> <li>➔ Bhí sé ina chathaoirleach ar chruinniú d'Fhoghrúpa Cigireachta CCEFI</li> <li>➔ Ghlac sé páirt ghníomhach sna foghrúpaí eile uile de chuid CCEFI agus i roinnt tascfhórsaí. Glacann ÚMICÉ páirt freisin sa cheannaireacht ar an bhfoghrúpa cigireachta, trína choiste eagraithe, agus i seisiún iomlánach CCEFI, trína ghrúpa comhairliúcháin</li> <li>➔ Glacadh páirt ghníomhach in dhá thascfhórsa de chuid IFIAR</li> </ul>
<b>Scaipeadh an dea-chleachtais</b>	<ul style="list-style-type: none"> <li>➔ Foilsíodh seacht dtuarascáil ar chigireachtaí</li> </ul>
<b>Éisteacht a fháil</b>	<ul style="list-style-type: none"> <li>➔ Reáchtáladh cruinniú faisnéise do choistí iniúchóireachta</li> <li>➔ Foilsíodh dhá pháipéar théamacha</li> <li>➔ Foilsíodh sraith léargas ar airgead tirim agus coibhéisí airgid thirim a iniúchadh</li> <li>➔ Foilsíodh clár iniúchóireachta bliantúil agus tuarascáil gníomhaíochta</li> </ul>
<b>Ár bpróisis a fhorbairt/a fheabhsú</b>	<ul style="list-style-type: none"> <li>➔ Cuireadh chun feidhme an Mhodheolaíochta Choiteann um Chigireacht ar Iniúchtaí chun measúnú a dhéanamh ar chórais rialaithe cáilíochta inmheánacha gnólachtaí a dhéanann iniúchóireacht ar ELPanna</li> <li>➔ Forbraíodh sraith páipéar oibre agus leanadh ar aghaidh á mionchoigeartú chun cigireacht a dhéanamh ar iniúchtaí aonair, agus sonraíochtaí caighdeán iniúchóireachta ar leith á gcur san áireamh chomh maith le hábhair ábhartha a bhaineann leis an gcineál eintitis nó leis an tionscal</li> </ul>

# Caibidil 6

---

## FORFHEIDHMIÚ

---

# Caibidil 6: Forfheidhmiú



## 1. Príomhfheidhmeanna

Is iad príomhfheidhmeanna an Aonaid Forfheidhmithe:

- imscrúduithe a dhéanamh ar neamhrialtachtaí a bhfuil amhras fúthu maidir leis an iniúchóireacht ar ELPanna
- fiosrúcháin a dhéanamh ar shárúithe a rinne CCFanna ar nósanna imeachta imscrúdaithe agus araíonachta, agus ar chomhlíonadh na CCAanna ar a bhfeidhmeanna i leith iniúcháirí reachtúla
- pionóis a riar a eascraíonn as imscrúduithe rialála

## 2. Forbairtí suntasacha

Bhí an deis ann in 2021 tuilleadh forbartha a dhéanamh ar a rialacháin maidir le fiosrúcháin faoi alt 933 agus imscrúduithe faoi alt 934 a dhéanamh, agus leanúint á gcur chun feidhme. Leis na rialacháin sin, is féidir leis an Údarás cur chuige atá faoi stiúir an Fheidhmeannais a ghlacadh i leith na céime tosaigh fiosrúcháin agus imscrúdaithe, agus is léir ó líon na gcásanna a osclaíodh agus a dúnadh i rith 2021 go bhfuil feabhas tagtha ar éifeachtúlacht an phróisis forfheidhmithe fhoriomlán. Dúnadh líon nach beag de na cásanna sin gan aon ghá a bheith le himscrúdú foirmiúil ná fiosrúchán foirmiúil. I rith na bliana, chuaigh an tÚdarás i mbun dhá chomhaontú socraíochta, ceann amháin a bhain le fiosrúchán faoi alt 933 agus ceann a bhain le himscrúdú faoi alt 934. Tá nasc chuig téacs na gcomhaontuithe sin ar ár suíomh gréasáin [anseo](#). Sheol an tÚdarás dhá fhiosrúchán faoi alt 933 agus dhá imscrúdú faoi alt 934. Dúnadh ceann amháin de na fiosrúcháin faoi alt 933 ag deireadh na bliana agus bhí na trí ábhar eile fós ar oscailt ag deireadh na bliana.

Chun tacú lena chur chuige nua i leith forfheidhmithe, d'fhoilsigh an tÚdarás a threoir i leith pionós agus a bheartas maidir le teorainneacha ama i dtaobh gearáin a dhéanamh. Lean sé leis an bhforbairt ar phróisis agus nósanna imeachta inmheánacha chun tacú leis an mbeartas forfheidhmithe nua.

Ar an leibhéal idirnáisiúnta, rannchuidigh Abhcóide Sínsreach Forfheidhmithe an Údaráis leis an obair a dhéanann CCEFI trí bhallraíocht sa Mheitheal Forfheidhmithe agus i bhfoghrúpa forfheidhmithe IFIAR.

## Imscrúdú faoi alt 934

D'fhoilsigh an tÚdarás sonraí faoi chomhaontú socraíochta a rinne sé le duine sonraithe, maidir le hiniúchadh a rinneadh ar ELP. Bhain samplaí de na hábhair atá sa chomhaontú socraíochta le:

- Ceistiú neamhleor i leith boinn tuisceana ar baineadh leas astu agus iarmhéid na n-iasachtaí agus na méideanna infhála á luacháil.
- Fianaise oiriúnach neamhleor i gcomhair an iniúchta agus mainneachtain measúnú leordhóthanach a dhéanamh ar thionchar na n-easnamh iomadúil sa réimse TF agus na gcoigeartuithe éagsúla iniúchta ar na nósanna imeachta a bhí pleanáilte.
- Nósanna imeachta neamhleora arna ndéanamh chun tástáil a dhéanamh ar iasachtaí/urrúis bhunúsacha a bheith ann.

D'admhaigh an duine sonraithe go ndearnadh sárúithe éagsúla ar chaighdeáin iniúchóireachta agus gearradh pionós ar an té sin dá réir. Tar éis dó breithniú a dhéanamh ar na pionóis atá ar fáil faoin dlí, ar threoir an Údaráis féin i leith pionós, agus ar chúinsí maolaithe éagsúla lena n-áirítear an teist gan smál a bhí ar an duine sin roimhe sin agus ina dhiaidh sin agus an chaoi ar chomhoibrigh an duine sin leis an Údarás, thug an tÚdarás iomardú don duine sonraithe agus ghearr sé fíneáil €10,500 ar an té sin, lena áiríodh lascaine 30% i leith luathshocrú.

Mar gheall ar an gcomhaontú socraíochta seachnaíodh costais bhreise agus ualach riaracháin de bharr imscrúdú leathnaithe, i gcás an Údaráis agus an duine shonraithe araon.

D'fhág an próiseas socraíochta sin go raibh bealach ag an Údarás agus ag na daoine sonraithe araon chun an t-ábhar a réiteach go luath. Is bealach é an luathshocrú chun úsáid éifeachtach a bhaint as acmhainní an Údaráis, teacht ar réiteach tráthúil agus trédhearcacht a chinntiú trí shonraí an cháis a fhoilsiú. Sa chomhaontú socraíochta, cuireadh leas an phobail san áireamh lena n-áirítear cosaint an phobail, muinín an phobail a chothú i ngairm na hiniúchóireachta agus cloí le caighdeáin chuí.

### 3. Straitéisí agus torthaí a eascraíonn as an bplean gnó

Straitéisí an phlean gnó	Torthaí
<b>Imscrúdú agus Fiosrúchán</b>	<ul style="list-style-type: none"><li>→ Forbraíodh treoir agus beartais agus cuireadh chun feidhme iad, go háirithe treoir maidir le pionóis agus beartas a bhaineann le teorainneacha ama i dtaobh gearáin a dhéanamh</li><li>→ Dréachtaíodh nósanna imeachta socraíochta agus cuireadh chun feidhme iad</li><li>→ Cuireadh imscrúduithe agus fiosrúcháin chun cinn</li><li>→ Baineadh amach torthaí cuí arna bhfianú ag na comhaontuithe socraíochta</li><li>→ Foilsíodh torthaí i gcomhréir le beartais</li></ul>
<b>Éisteacht a fháil</b>	<ul style="list-style-type: none"><li>→ Foilsíodh aiseolas ar chomhairliúchán maidir le treoir faoi pionóis</li><li>→ Ghlac an tÚdarás páirt i bhFoghrúpa Forfheidhmithe CCEFI, lena n-áirítear glaonna comhdhála tréimhsiúla</li><li>→ Ghlacadh sé páirt i bhfoghrúpa forfheidhmithe IFIAR agus labhair ionadaí dá chuid ag comhdháil idirnáisiúnta.</li><li>→ Ghlac sé páirt i gcruinnithe comhchéime le geallsealbhóirí</li></ul>

# Caibidil 7

---

SEIRBHÍ  
CORPARÁIDEACHA

---

# Caibidil 7: Seirbhísí Corparáideacha



## 1. Príomhfheidhmeanna

Is iad príomhfheidhmeanna an Aonaid Seirbhísí Corparáideacha:

- tacaíocht ó thaobh seirbhísí corparáideacha a sholáthar do ÚMICÉ, lena n-áirítear seirbhísí airgeadas, seirbhísí acmhainní daonna, seirbhísí TFC agus bainistíocht saoráidí
- rúnaíocht a sholáthar don bhord agus do choistí áirithe de chuid an bhoird
- maoirseacht a dhéanamh ar an bpróiseas bainistíochta riosca do ÚMICÉ
- seirbhísí dlí inmheánacha a sholáthar, lena n-áirítear comhairle oibriúcháin ó lá go lá agus gach feidhm a bhaineann le RGCS

## 2. Forbairtí suntasacha

Leathnaíodh ról an aonaid go luath in 2021 chun gach seirbhís tacaíochta a chuimsiú agus, go háirithe, cuireadh leis an bhfeidhm bainistíochta acmhainní daonna. I rith na bliana, lean an t-aonad ar aghaidh ag comhlíonadh a spriocdhátaí reachtúla in ainneoin an t-ualach oibre a bheith ag dul i méid agus in ainneoin thionchar na paindéime. Ina measc siúd, bhí ráitis airgeadais reachtúla ÚMICÉ agus na tuairisceáin chuideachta uaidh, agus ceanglais an Chóid Cleachtais chun Comhlachtaí Stáit a Rialú. Tá sonraí breise ina leith sin in áit eile sa tuarascáil seo, go háirithe sa chuid a bhaineann le Rialachas agus Struchtúr.

Lean ÚMICÉ ar aghaidh leis an gcianobair ar feadh na bliana go léir agus chinntigh an t-aonad go raibh na seirbhísí tacaíochta, a bhain go príomha le TFC, ag feidhmiú go héifeachtach stuama sna cúinsí sin. Rinne an t-aonad tástáil inmheánach athshlánaithe ó thubaiste agus tástáil threáite sheachtrach, faoi

fhormhaoirsiú ag an gCoiste Iniúcháireachta agus Riosca, agus níor aimsíodh aon laigí i bpróisis chianrochtana an Údaráis.

Maidir le hacmhainní daonna, rinne an t-aonad athbhreithniú iomlán ar a chórais inmheánacha bainistíochta feidhmíochta, agus thug sé isteach córas athbhreithnithe maidir le socrú spriocanna agus forbairt feidhmíochta, córas a mbainfear úsáid as in 2022. Ar leithligh, bhreithnigh an t-aonad ráiteas inghlacthachta riosca an Údaráis agus an cur chuige atá aige maidir le lamháltas riosca a chainníochtú ar fud a feidhmeanna. Bhíothas fós ag obair ar an tionscadal sin ag deireadh na bliana.

### Socrú spriocanna agus forbairt feidhmíochta

Lean an tÚdarás air ag díriú ar a bhaill foirne, an phríomhshócmhainn atá aige, i rith na bliana. Mar chuid de sin, rinne an t-aonad athbhreithniú mionsonraithe ar an gcur chuige atá ag ÚMICÉ maidir le measúnú agus forbairt feidhmíochta, agus thug sé isteach roinnt feabhsuithe ar an bpróiseas foirmiúil. Chomh maith lena bheith ag díriú ar thascanna amháin – rud a mbaineann tábhacht leis fós – leagfar an bhéim chéanna anois sa phróiseas sin ar fhorbairt phearsanta na bhfostaithe, agus ar bhunluachanna eagraíochta ÚMICÉ a chur i ngníomh. Is iad an tsármhaitheas, an neamhspleáchas agus an t-ionracas na bunluachanna sin. Forbraíodh an cur chuige i leith na gcruinnithe foirmiúla débhlantúla freisin chun an luach is fearr a bhaint amach do na baill foirne, do na bainisteoirí agus don eagraíocht. Tá an próiseas sin anuas ar na hidirghníomhaíochtaí rialta ar leibhéal foirne agus ar an leibhéal aonair, a dhéantar san fhíorshaol nuair is féidir é sin in aon chor i bhfianaise srianta sláinte poiblí, nó ar nasc físe.

## 3. Straitéisí agus torthaí a eascraíonn as an bplean gnó

Straitéisí an phlean gnó	Torthaí
<b>Scaipeadh an dea-chleachtais</b>	<ul style="list-style-type: none"><li>→ D'fhormheas an bord an Tuarascáil Bhliantúil Reachtúil</li><li>→ Cuireadh tuarascálacha faoi shainordú ar fáil don Aire agus iad ag cloí le spriocamanna reachtúla</li></ul>
<b>Úsáid éifeachtúil ar n-acmhainní airgeadais a áirithiú</b>	<ul style="list-style-type: none"><li>→ Ghlac an bord an Clár Caiteachais (an buiséad) agus d'fhormheas an tAire é</li><li>→ Bhí toradh rathúil ar athbhreithniú a rinne iniúcháirí inmheánacha agus iniúcháirí seachtracha ar chórais rialaithe inmheánaigh</li></ul>
<b>Éisteacht a fháil</b>	<ul style="list-style-type: none"><li>→ Gníomhaíodh mar an bpríomhphointe teagmhála le hiriseoirí agus le hionadaithe poiblí</li><li>→ Leanadh den chaidreamh láidir, éifeachtach le haonad idirchaidrimh na Roinne</li></ul>
<b>Próisis a fhorbairt/a fheabhsú</b>	<ul style="list-style-type: none"><li>→ Rinneadh cothabháil leanúnach ar an mbonneagar TFC agus ar an tsamhail chianoibre agus rinneadh infheistíocht leanúnach iontu</li><li>→ Cuireadh feabhas ar an tslándáil maidir le rochtain ar an líonra agus gléasanna móibíleacha.</li><li>→ Forbraíodh cur chuige athbhreithnithe maidir le spriocanna na bhfostaithe a leagan síos agus maidir le forbairt feidhmíochta.</li><li>→ Soláthraíodh tacaíocht chomhairleach dhlíthiúil ar bhonn inmheánach.</li></ul>

# Caibidil 8

---

FORBAIRT  
EAGRAÍOCHTÚIL

---

# Caibidil 8: Forbairt Eagraíochtúil



## 1. Príomhfheidhmeanna

Is iad príomhfheidhmeanna an aonaid um fhorbairt eagraíochtúil:

- tionscnaimh a fhorbairt lena bhfeabhsaítear éifeachtúlacht agus éifeachtacht na heagraíochta
- tacú le cultúr nuálaíochta in ÚMICÉ
- láithreach meán sóisialta a bhainistiú do ÚMICÉ
- tacú le coistí foirne ÚMICÉ maidir le smaointe a fhorbairt go dtí go gcuirfead chun feidhme iad

## 2. Forbairtí suntasacha

During 2021, IAASA developed an innovation strategy, aligned D'fhorbair ÚMICÉ straitéis nuálaíochta in 2021, straitéis a bhí ailínithe le straitéis nuálaíochta na hearnála poiblí, agus leasaítear an straitéis sin de réir mar is gá chun aghaidh a thabhairt ar chúinsí sonracha ÚMICÉ. Is é uaillmhian shonrach ÚMICÉ i leith na nuálaíochta deiseanna nuálaíochta a thapú sna bealaí ina ndéanann sé maoirsiú agus cur chun cinn ar thuarisciú airgeadais ardchaighdeáin, iniúchóireacht agus rialáil éifeachtach i leith ghairm na cuntasáíochta ar mhaithe le leas an phobail. Leagtar amach sa straitéis na tosaíochtaí i leith na nuálaíochta in ÚMICÉ, sonraítear inti gníomhaíochtaí faoi chuimsiú gach tosaíochta agus cuirtear bailchríoch uirthi le conair chun an nuálaíochta a chur chun feidhme. Tá sí nasctha le clár oibre trí bliana an Údaráis agus déantar na bearta nuálaíochta a chuimsiú i bplean gnó bliantúil gach aonaid agus sna pléití le gach fostaí maidir le spriocanna, feidhmíocht agus forbairt.

Tugadh chun críche i rith na bliana roinnt tionscnaimh nuálaíochta i bhformáid haiceatóin, lena n-áirítear tuairisceáin bhliantúil an CCF agus próifíl na gairme a chuíchóiriú, tuarascáil chineálach um cháilíocht iniúchta a fhorbairt, bunachar sonraí tuairiscithe airgeadais a bhunú, córas bainistíochta ama a chur chun feidhme agus tionscadal a thabhairt i gcrích maidir le comhaid cigireachta iniúchta a chur i gcartlann. Chomh maith leis sin, d'fhorbraíomar 'balla aitheantais don nuálaíocht', balla digiteach chun gnóthachtáil na foirne maidir leis na tionscnaimh sin a léiriú.

Áiríodh ar ghníomhaíochtaí eile um fhorbairt eagraíochtúil forbairt leanúnach ar láithreach meán sóisialta an Údaráis ar LinkedIn, chomh maith le cainéal YouTube a bhunú agus leathnú a dhéanamh ar raon na meán agus na bhformáidí a úsáidtear chun cumarsáid a dhéanamh lenár ngeallsealbhóirí. I nuachtlitir ráithiúil don fhoireann ar fhorbairt eagraíochtúil, soláthraíodh eolas faoi uirlisí agus teicnící nuálaíochta agus cinn chun fadhbanna a réiteach. Ina theannta sin, d'fhreastail baill foirne de chuid an Údaráis go rialta ar an gclár imeachtaí ar líne a d'eagraigh foireann nuálaíochta seirbhíse poiblí na Roinne Caiteachais Phoiblí agus Athchóirithe.

## Luachanna ÚMICÉ

I rith 2021 thugamar faoi thionscadal chun luachanna comhroinnte na heagraíochta a shainiú, mar aon le sraith iompraíochtaí lárnacha atá ailínithe leis na luachanna agus nach mór do na baill foirne go léir iad a léiriú. Léirítear lenár luachanna cad dó a sheasaimid agus cad a mheasaimid atá tábhachtach sa tslí ina mbímid ag obair. Seo a leanas iad:

**Sármhaitheas:** *Ár míle dícheall a dhéanamh* – breithnímid an mórfhictiúr, comhlíonaimid ardchaighdeáin feidhmíochta agus bainimid amach torthaí ardcháilíochta, is speisialtóirí muid inár réimse agus bímid seasta ag gabháil don fheabhsú agus don nuáil, cothaímid caidreamh agus foghlaimímid ó dhaoine eile

**Neamhspleáchas:** *Rialáil a dhéanamh ar bhealach neamhchlaonta, oibiachtúil* – breithnímid gach dearcadh agus déanaimid breithiúnas tomhaiste, tugaimid dúsdlán go stuama, cuiditheach, cosnaímid ár neamhspleáchas ar choinbheachtaí leasa agus ar thionchar míchuí

**Ionracas:** *A bheith iontaofa agus ómósach* – tá intinn oscailte againn, táimid macánta agus uilechuimsitheach, gníomhaímid go cróga, diombháilte, léirimid cuntasach as ár gcuid oibre agus ár ngníomhartha, téimid i mbun rannpháirtíochta ar bhealach a léiríonn comhbhá agus meas



### 3. Gníomhaíochtaí agus torthaí a eascraíonn as an bplean gnó

Straitéisí an phlean gnó	Torthaí
<b>Éisteacht a fháil</b>	<ul style="list-style-type: none"><li>→ Cothaíodh láithreach ghníomhach ar LinkedIn do ÚMICÉ</li><li>→ Seoladh cainéal YouTube de chuid ÚMICÉ</li><li>→ Cuireadh leis an úsáid a bhaintear as físeáin agus formáidí cumarsáide eile chun príomhtheachtaireachtaí a chur in iúl</li><li>→ Cuireadh oiliúint ar fáil don fhoireann maidir le conas cumarsáid éifeachtach a dhéanamh i scríbhinn</li></ul>
<b>Ar bpróisis a fhorbairt/a fheabhsú</b>	<ul style="list-style-type: none"><li>→ Tugadh chun críche ocht dtionscadal nuálaíochta i bhformáid haiceatóin</li><li>→ Forbraíodh ráiteas faoi luachanna agus iompraíocht ÚMICÉ</li><li>→ Coinníodh ar bun inlíon foirne agus líonra sóisialta ar líne, lena cinntíodh gur roinneadh an scéala ba nuaí faoi thionscnaimh nuálaíochta agus faoi ghníomhaíochtaí eile a raibh spéis ag an bhfoireann i gcoitinne iontu</li><li>→ Reáchtáladh seisiúin 'nasctha agus rannpháirtíochta' don fhoireann chun nuacht agus faisnéis a chomhroinnt ar fud na heagraíochta</li></ul>
<b>Nuálaíocht</b>	<ul style="list-style-type: none"><li>→ Forbraíodh straitéis nuálaíochta de chuid ÚMICÉ, atá ailínithe leis an straitéis seirbhíse poiblí</li><li>→ Foilsíodh nuachtlitrí ráithiúil don fhoireann maidir le forbairt eagraíochtúil, inar díriodh aird ar uirlisí agus teicnící úsáideacha nuálaíochta</li><li>→ Bunaíodh balla aitheantais nuálaíochta chun gnóthachtáil na foirne maidir le tionscnaimh nuálaíochta a léiriú</li><li>→ Tacaíodh le raon tionscnamh de chuid an choiste foirne ar fholláine agus ar an gclár oibre glas</li><li>→ Bhíodhas páirteach sa tseachtain nuálaíochta agus in imeachtaí ar líne de chuid líonra nuálaíochta na seirbhíse poiblí</li></ul>

# Caibidil 9

---

RIALACHAS AGUS  
STRUCHTÚR

---

# Caibidil 9: Rialachas Agus Struchtúr

## Struchtúr dlí

Is cuideachta faoi theorainn ráthaíochta é ÚMICÉ ag a raibh na 10 gcomhalta seo a leanas an 31 Nollaig 2021:

- Comhlachas na gCuntasóirí Deimhnithe Cairte\*
- Comhlachas na gCuntasóirí Idirnáisiúnta\*
- Institiúid Cairte na gCuntasóirí Bainistíochta\*
- Institiúid Cairte an Airgeadais Phoiblí agus na Cuntasaíochta\*
- Banc Ceannais na hÉireann
- An Stiúrthóir um Fhorfheidhmiú Corparáideach
- Institiúid na gCuntasóirí Deimhnithe Poiblí in Éirinn\*
- Institiúid na gCuntasóirí Cairte in Éirinn\*
- Stocmhalartán na hÉireann
- Na Coimisinéirí Ioncaim

\*CCF

## Struchtúr eagraíochtúil

### Forléargas

Faoi dheireadh na bliana, 32 ball foirne a bhí ag ÚMICÉ (2020: 30), agus iad roinnte ina gceithre aonad mar seo a leanas:

- Aonad na nOibríochtaí, a dhéanann formhaoirseacht ar fheidhmeanna maoirseachta ÚMICÉ maidir le:
  - dearbhú cáilíochta i leith iniúchtaí ar ELPanna;
  - scrúdú ar thuarascálacha airgeadais eintiteas ar leith le fáil amach an bhfuil siad i gcomhréir leis an gcreat ábhartha tuairiscithe airgeadais; agus
  - maoirsiú ar rialáil CCFanna ar a gcomhaltaí
- An tAonad um Chaighdeáin, Beartas agus Forbairt Eagraíochtúil, a bhí ag plé go príomha le:
  - caighdeáin agus treoir maidir leis an iniúchóireacht a ghlacadh in Éirinn;
  - tionscadail nuálaíochta faoi stiúir na foirne a chur i bhfeidhm agus tacú le coistí éagsúla ceannaireachta foirne an Údaráis; agus
  - cumarsáid inmheánach agus láithreach ar na meáin shóisialta.
- An tAonad um Fhorfheidhmiú, a chomhordaíonn imscrúduithe agus fiosrúcháin reachtúla an Údaráis; agus

- Aonad na Seirbhísí Corparáideacha, a sholáthraíonn tacaíocht do ÚMICÉ maidir le cúrsaí airgeadais, riaracháin, acmhainní daonna agus TFC, mar aon le rúnaíocht a sholáthar don bhord agus do choistí áirithe.

## Líon formheasta na mball foirne


Is é ÚMICÉ a chinneann líon, gráid, agus téarmaí agus coinníollacha fhoireann ÚMICÉ le formheas an Aire Fiontar, Trádála agus Fostaíochta (an tAire), rud a thugtar le toiliú ón Aire Caiteachais Phoiblí agus Athchóirithe. Fágann sin gur gá formheas a fháil roimh ré ón mbeirt Airí chun aon leasuithe a dhéanamh ar líon foirne formheasta ÚMICÉ. Leagtar amach thíos líon foirne formheasta ÚMICÉ i ndeireadh na bliana, agus a líon foirne iarbhír.

Líonta foirne formheasta agus líon iarbhír i ndeireadh na bliana

Grád	Formheasta	Iarbhír
<b>Príomhfheidhmeannach</b>	1	1
<b>Cinn Feidhme</b>	5	3
<b>Bainisteoirí Sinsearach</b>	8	6
<b>Cigirí agus Bainisteoirí Tionscadail</b>	13	11
<b>Lucht Feidhmiúcháin agus Riaracháin</b>	16	11
<b>Iomlán</b>	<b>43</b>	<b>32</b>

## Cairt eagraíochta

Bhí struchtúr eagraíochtúil ÚMICÉ amhail an 31 Nollaig 2021 mar a leagtar amach sa chairt eagraíochta thíos.



## Forlérargas ar chúrsaí airgeadais

Den chuid is mó, maoinítear ÚMICÉ trí dheontas ón Státchiste, tobhach reachtúil ar na CCFanna, tobhach reachtúil ar ghnólachtaí a dhéanann iniúcháireacht ar ELPanna, agus trí tháillí a ghearradh as seirbhísí clárúcháin. Déantar na foinsí cistiúcháin uile a rialú le forálacha an Achta. Ina cháil mar chuideachta faoi theorainn ráthaíochta, tugann ÚMICÉ ráitis airgeadais ar aird i gcomhréir le hAcht na gCuideachtaí, agus déanann an tArd-Reachtaire Cuntas agus Ciste (ARCC) iniúchadh orthu dá réir agus taisceann leis an Oifig um Chlárú Cuideachtaí iad.

B'ionann an caiteachas iomlán in 2021 agus €4.4m (2020: €4.3m) ó bhuiséad €6.0m (2020: €6.1m). Ba iad na príomhathruithe i gcomparáid leis an mbuiséad:

- gannchaiteachas mór ar chostais taistil agus chothaithe agus ar chaiteachas oifige mar gheall ar thionchar COVID-19; agus
- laghdú ar an gcaiteachas ar chomhairleoireacht mar gheall ar aistriú ó fhoinsíú allamuigh ar réamh-athbhreithnithe ar ráitis airgeadais, agus costais dlí agus costais i leith comhaltaí coiste a bheith laghdaithe mar gheall ar chleachtais éifeachtúla forfheidhmithe.

## Rialachas

### An bord stiúrthóirí

Rialaíonn naonúr stiúrthóirí ÚMICÉ agus tá ochtar díobh sin ina stiúrthóirí neamhfheidhmiúcháin. Ceapann an tAire iad ar bhonn ainmniúcháin ó na heintitis sin a leagtar amach thíos. Is é an stiúrthóir eile an Príomhfheidhmeannach, arna cheapadh ag an mbord.

### An bord stiúrthóirí – comhlachtaí ainmniúcháin

Comhlacht ainmniúcháin	Ainmnithe
An tAire	2
CCFanna (i gcompháirt le chéile ar bhonn comhaontú)	2
Banc Ceannais na hÉireann	1
An Stiúrthóir um Fhorfheidhmiú Corparáideach	1
Stocmhalartán na hÉireann	1
Na Coimisinéirí Ioncaim	1
Iomlán	8

Triúr den ochtar stiúrthóirí sin ar a mhéad a fhéadfaidh a bheith ina gcomhaltaí de CCF.

## Beathaisnéisí na stiúrthóirí

Tá taithí ar feadh an tsaol ar chúrsaí rialála agus gnó ag **Martin Sisk, an Cathaoirleach**. Is aturnae cáilithe é agus chuir sé tús lena ghairm bheatha in Oifig na gCoimisinéirí Ioncaim, d'fhóin sé mar Chlárúitheoir na gCara-Chumann 1985–2003, Leas-Chlárúitheoir na gComhar Creidmheasa 2003–2006, Leas-Cheann na gCód Cosanta Tomhaltóirí 2007–2008 agus Ceann an Aonaid um Fhrithsciúradh Airgid, Maoiniú Sceimhlitheoireachta agus Smachtbhannaí Airgeadais de chuid an Bhaic Ceannais 2008–2010. Chuaigh sé ar scor ón mBanc Ceannais i mí Iúil 2010. Toghadh Martin chuig bord Chomhar Creidmheasa Mhullach Íde agus na Dúiche i mí na Nollag 2010 agus is Stiúrthóir é go fóill. D'fhóin sé mar choimisinéir ar Choimisiún na Scrúduithe Stáit ó 2017 i leith. Is iarchomhalta boird (2011–2021) de chuid Chomharchumann na gComhar Creidmheasa in Éirinn é Martin agus bhí sé ina leas-uachtarán air (2011–2013) agus ina uachtarán air (2013–2015), ba stiúrthóir agus cathaoirleach ar VHI Healthcare (2012–2015) é, agus ba chomhalta boird é de chuid an Údaráis um Fhaisnéis agus Cáilíocht Sláinte (2015–2020).

Tháinig **Kevin Prendergast, an Príomhfheidhmeannach**, ag obair le ÚMICÉ i mí na Samhna 2016 tar éis a bheith ina Cheann Forfheidhmiúcháin le hOifig an Stiúrthóra um Fhorfheidhmiú Corparáideach. Bhí sé fostaithe ag an Oifig sin ó 2005. Roimhe sin, bhí sé ag obair i Rannán na gCásanna Móra de chuid Oifig na gCoimisinéirí Ioncaim agus tá taithí roinnt blianta aige san earnáil phríobháideach freisin lena n-áirítear roinnt blianta a chaith sé ag obair i ngnólacht iniúcháireachta. Is Comhalta é Kevin de chuid Chuntasóirí Cairte Éireann. Tá Céim Baitsiléara agus Máistreacht aige sa Chuntasaíocht ón gColáiste Ollscoile, Baile Átha Cliath, agus tá Máistreacht san Eolaíocht aige freisin sa Cheannaireacht Feidhmiúcháin ó Ollscoil Uladh.

Is Léachtóir le Cuntasaíocht í **Clodagh Hegarty** agus is Stiúrthóir Cúrsa í i Scoil Ghnó Ollscoil Uladh, Coláiste Mhic Aodha, áit a mbíonn sí ag tabhairt léachtaí go fairsing faoin tuairiscíú iniúcháireachta agus airgeadais. Is Stiúrthóir um Staidéar Comhcheangailte í freisin ag Ollscoil Uladh, Coláiste Mhic Aoidh. Is Comhalta de Chomhlachas na gCuntasóirí Deimhnithe Cairte í agus is Comhairleoir Cánach Cairte í. Bhíodh sí ina Cathaoirleach ar Choiste CCDC in Éirinn. Sula ndeachaigh sí leis an saol acadúil, chaith Clodagh 15 bliana ag obair sa chleachtas le EY, Baile Átha Cliath agus sa chleachtadh ginearálta in *North West*.

Is abhcóide é **David Hegarty** atá ag obair mar Phríomhoifigeach in Oifig an Stiúrthóra um Fhorfheidhmiú Corparáideach. Cháiligh sé ina aturnae in 2002 agus d'aistrigh sé chuig an mBarra in 2006, agus é ag cleachtadh go príomha i réimse na cosanta coiriúla agus na habhcóideachta. Tá sé cláraithe ar Rolla Abhcóidí Cleachtacha ÚRSD i seirbhís lánaimsire an Stáit. Sula ndeachaigh sé ag obair le OSFC, bhí sé ina Abhcóide Comhairleach in Oifig an Chomhairleora Dlí Pharlaimintigh mar ar chuir sé comhairle ar Choimisiún agus Seirbhís Thithe an Oireachtais agus ar choistí parlaiminteacha ar ábhair a bhaineann leis an dlí bunreachtúil, an dlí parlaiminteach agus an dlí riaracháin. Bhíodh sé ag obair freisin mar oifigeach dlí i Misean an Aontais Eorpaigh um Rialú an Dlí sa Chosaiv (EULEX) agus ag an mBinse Speisialta don Liobáin sa Háig, agus é ag obair i nDlísheomraí Breithiúna le breithiúna ó thiortha éagsúla agus coireacht eacnamaíoch, éilliú, mí-úsáid oifige poiblí, coireanna cogaidh agus comhcheilg chun cásanna sceimhlitheoireachta a chur i gcrích á n-éisteacht acu.

Is stiúrthóir neamhfheidhmiúcháin neamhspleách agus cathaoirleach ar an gCoiste Iniúchóireachta le *Athora Ireland plc* í **Aisling Kennedy** agus is stiúrthóir neamhfheidhmiúcháin neamhspleách agus cathaoirleach ar an gCoiste Riosca í le *ECCU Assurance DAC*. Bhí an ról deireanach a bhí aici, sula ndeachaigh sí lena gairm bheatha neamhfheidhmiúcháin i mí Feabhra 2020, le *Swiss Re* mar Cheann Praghsála – Saol agus Sláinte – an Ríocht Aontaithe, Éire agus Iosrael. Ar na ról a bhí aici roimhe sin i gcaitheamh a gairme beatha sna seirbhísí airgeadais le breis agus 35 bliana anuas, áirítear: Stiúrthóir Cliant ag *Mercer*, Éire, Stiúrthóir ar Ghnóthaí Gairmiúla ag Cumann na nAchtúirí in Éirinn agus Stiúrthóir um Fhorbairt Gnó le VHI. Bhí sí ina cathaoirleach ar an gCoiste Iniúchóireachta ag ComReg freisin idir 2014 agus 2016. Is Comhalta agus iarChomhalta Comhairle de Chumann na nAchtúirí in Éirinn í Aisling agus is Cleamhnaí í de chuid Ghairm na hAchtúireachta, an Ríocht Aontaithe.

Tá **Aisling McArdle** ina Ceann Rialála ag *Euronext* i mBaile Átha Cliath agus is comhalta í de chuid fhoireann rialála dhomhanda *Euronext*. Chuaigh sí isteach i Stocmhalartán na hÉireann in 2002 agus bhí ról rialála éagsúla aici laistigh den chuideachta le 17 mbliana anuas. Rinneadh Ceann Rialála, Baile Átha Cliath di i mí Mheán Fómhair 2018, agus tá sí freagrach as an rialáil agus as oibríochtaí a bhaineann le liostú ionstraimí airgeadais ar mhargaí *Euronext*, Baile Átha Cliath, ar fud réimse aicmí sócmhainne agus ar fud roinnt dlínsí. Tá Aisling freagrach as an rannpháirtíocht rialála le heisitheoirí agus rannpháirtithe margaidh agus le húdarás rialála sa tír seo agus san Aontas Eorpach. Glacann sí páirt sa Lónra Eorpach um Rialachas Corparáideach agus is iarchomhalta í de chuid Ghrúpa Athbhreithnithe an Díl Cuideachtaí agus Ghrúpa Faireachais na Margaí Idirnáisiúnta. Is Ceadúnach í de chuid Chumann na nOifigeach Comhlíontachta in Éirinn.

Is Cuntasóir Cairte é **Ronan Nolan** agus bhí sé ina Uachtarán ar Chuntasóirí Cairte Éireann in 2014/2015. Scoir sé mar pháirtí in Deloitte i mí na Bealtaine 2015 tar éis dó a bheith ina pháirtí comhairleach sinsearach agus ina chathaoirleach ar an ngnóilacht.

Tá **Brendan Sheridan** ag obair i réimse na seirbhísí airgeadais le daichead bliain anuas san earnáil phríobháideach agus san earnáil phoiblí araon agus ghlac sé ról i réimse an airgeadais, na pleanála, an tuairiscithe, an chlaochlathithe gnó agus na straitéise gnó. Toisc aird a bheith á díriú aige ar an bhfiachas anásta i mbanc sa tír seo, chuaigh sé ag obair leis an mBanc Ceannais in 2011 chun rannchuidiú le réiteach iasachtaí neamhthuillmheacha. Ar dtús, bhí sé i gceannas ar fhoireann creidmheasa ar feadh trí bliana, ag plé leis an Triúracht ar bhonn ráithiúil agus is é a bhí i gceannas ar chigireachtaí ar an láthair, tástálacha struis agus pleananna feabhsúcháin ar fud fhorais chreidmheasa na hÉireann. Ó 2015 go 2018, bhí Brendan i gceannas ar an bhfeidhm um Thuairiscíú Airgeadais sa Bhanc Ceannais agus, le linn na tréimhe sin, d'fhorbair sé straitéis don Rannán Airgeadais. Thug sé faoi athbhreithniú ar chur chuige an Bhainc Ceannais i leith a ghníomhaíochtaí rialála a chistiú agus, mar thoradh air sin, arna iarraidh sin don Leas-Rialtóir – Rialáil Stuamachta, in 2019 ghlac sé freagracht as straitéis ilbhliantúil chun deireadh a chur ar an iomlán le hualach na gcostas rialála ar an gcáiníocóir. Ina theannta sin, tá Brendan i gceannas ar chomhordú na bpróiseas bliantúil pleanála agus tuairiscithe rialála do cholún na Rialála Stuamachta de chuid an Bhainc Ceannais i ról ina ndéantar cuimsiú loighciúil anois

ar ghníomhaíochtaí pleanála, buiséadaithe, tuairiscithe agus aisghabhála costas. Tá Brendan ina chomhalta de CCDC, agus tá Máistreacht sa Chleachtas Gnó aige.

Leagtar amach in Aguisín 1 comhdhéanamh an bhoird i ndeireadh na bliana agus athruithe i measc na stiúrthóirí ón uair a foilsíodh an Tuarascáil Bhliantúil deiridh.

## Nósanna imeachta an bhoird

Tionólaíonn an bord cruinnithe rialta agus is féidir leis cruinnithe neamhsceidealaithe a thionól más gá sin. Faigheann comhaltaí an bhoird faisnéis sách luath roimh na cruinnithe sin chun gur féidir leo í a mheas agus a thuiscint i gceart.

Tá sceideal ábhar curtha i bhfeidhm ag an mbord, rud atá forchoimeáda go sonrach dó chun críche cinnteoireachta, lena gcumhdaítear na príomhréimsí rialachais, airgeadais, riosca agus formhaoirseachta. Tá ábhair áirithe tarmilgthe chuig Coistí boird, mar a leagtar amach i gcuid 4.5. Tá córas curtha i bhfeidhm ag an mbord freisin chun údarás a tharmilgean go foirmiúil chuig an bPríomhfheidhmeannach.

Ainmnítear comhaltaí an bhoird mar stiúrthóirí ar ÚMICÉ chun gníomhú i gcomhréir leis an reachtaíocht ábhartha agus chun gníomhú chun leas ÚMICÉ agus chun a leas a chosaint agus a chur chun cinn. Tugann na comhaltaí boird uile breithiúnas neamhspleách ar shaincheisteanna a ndéileáil an bord leo. Tá beartas foirmiúil i bhfeidhm ag an mbord chun déileáil le coinbhleachtaí leasa a d'fhéadfadh teacht chun cinn, lena n-áirítear oibleagáidí agus ceanglais maidir le nochtadh lena ndearbhaítear nach nglacfaidh stiúrthóirí páirt in aon phléití ná cinnítí i leith aon choinbhleachtaí den sórt sin.

## Ráiteas rialachais

Feidhmíonn ÚMICÉ mar chuideachta faoi theorainn ráthaíochta faoi fhorálacha Acht na gCuideachtaí, 2014. Leagtar amach feidhmeanna an bhoird in alt 905 den Acht. Is é an bord atá freagrach as an dea-rialachas a áirithiú. Déanann sé an méid sin trí chuspóirí agus spriocanna straitéiseacha a leagan síos agus cinnítí straitéiseacha a dhéanamh maidir leis na príomhshaincheisteanna gnó uile. Tá an Príomhfheidhmeannach freagrach as bainistiú, rialú agus stiúradh rialta laethúil ÚMICÉ le tacaíocht agus cúnamh na foirne ceannaireachta. Ní mór don Phríomhfheidhmeannach agus don fhoireann ceannaireachta cloí leis an treoir straitéiseach leathan a leagann an bord síos, agus ní mór dóibh a áirithiú go mbeidh tuiscint shoiléir ag na comhaltaí boird uile ar na príomhghníomhaíochtaí agus na príomhchinnítí a bhaineann leis an Údarás, agus ar aon rioscaí suntasacha is dóigh a thiocfaidh chun cinn. Cé go bhfreastalaíonn comhaltaí den fhoireann ceannaireachta ar chruinnithe boird go rialta, gníomhaíonn an Príomhfheidhmeannach, atá ina stiúrthóir freisin, mar theagmhálaí díreach idir an bord agus feidhmeannas ÚMICÉ.

## Freagrachtaí an bhoird

Leagtar amach obair agus freagrachtaí an bhoird sa sceideal ábhar atá forchoimeáda don bhord, sa chód iompair do chomhaltaí boird, agus i mbeartaí bhoird ghaolmhara. Ar na míreanna buana a mheasann an bord áirítear:

- dearbhú coinbhleachtaí leasa;
- tuarascáil an Phríomhfheidhmeannaigh, lena n-áirítear

mionsonraí ar obair na n-aonad oibríochtúil éagsúil mar aon le faisnéis airgeadais leanúnach agus cuntais bhainistíochta;

- nithe atá le cinneadh ag an mbord;
- ábhair lena bplé;
- ábhair spéise thráthúla;
- bainistíocht riosca;
- tuarascálacha ó choistí; agus
- an tuarascáil ón Rúnaí.

Cuirtear de cheangal ar an Údarás taifid airgeadais a choinneáil agus ráitis airgeadais a ullmhú i gcomhréir le hAcht na gCuideachtaí, mar a mhionsonraítear sna ráitis airgeadais.

Is é an bord atá freagrach as an bplean agus as an mbuiséad bliantúil a fhorghnó. Déanann an bord faisnéis airgeadais, lena n-áirítear cuntais bhainistíochta lena mionsonraítear an caiteachas iarbhair agus an caiteachas a leagtar amach sa bhuiséad, a mheas ag gach cruinniú sceidealaithe. Tá an bord freagrach as a shócmhainní a chosaint agus, dá réir sin, as bearta réasúnacha a dhéanamh chun calaíoch agus neamhrialtachtaí eile a chosc agus a bhrath.

Measann an bord gurb amhlaidh a thugtar léargas fórcheart i ráitis airgeadais ÚMICÉ ar fheidhmíocht airgeadais agus staid airgeadais ÚMICÉ an 31 Nollaig 2021.

### Ceapachán chuig an mbord

Feidhmíonn an tÚdarás go neamhspleách ar an Rialtas agus tá cosc reachtúil ar an Aire orduithe a thabhairt don Údarás i gcomhlíonadh a fheidhmeanna. Ceapann an tAire comhaltaí (seachas an Príomhfheidhmeannach) ar feadh tréimhsí trí go cúig bliana. Sa ghnáthchúrsa, ceaptar comhaltaí ar feadh tréimhse trí bliana agus ceaptar an Cathaoirleach ar feadh cúig bliana. Leagtar amach in Aguisín 1 comhdhéanamh an bhoird an 31 Nollaig 2021, agus athruithe ón dáta sin i leith.

Rinne an bord meastóireacht sheachtrach ar a fheidhmíocht féin mar a thuairiscítear sna ráitis airgeadais.

### Coistí boird

Forchoimeádann an bord chuige féin an chumhacht coistí a bhunú chun cabhrú leis a fheidhmeanna agus a fhreagrachtaí a chomhlíonadh. Faoi sceideal an bhoird um ábhair fhorchoimeáda, tá téarmaí tagartha i scríbhinn ag gach coiste agus tuairiscíonn siad go rialta don bhord. Ba é an coiste iniúchóireachta agus riosca an t-aon choiste a bhí ann in 2021.

### An coiste iniúchóireachta agus riosca

Triúr stiúrthóirí neamhfheidhmiúcháin atá ar an gcoiste iniúchóireachta agus riosca (CIR):

- Aisling McArdle, Uasal (Cathaoirleach)
- An tUasal David Hegarty
- An tUasal Ronan Nolan

Tá a théarmaí tagartha leagtha amach ina [chairt](#), atá le feiceáil ar shuíomh gréasáin an Údaráis. Leagtar amach sa chairt róil agus freagrachtaí sonracha an choiste, lena n-áirítear athbhreithniú ar thuarascáil bhliantúil an Údaráis agus ar a ráitis airgeadais sula ndéanann an bord breithniú orthu. I measc na ngníomhaíochtaí eile a rinne an coiste linn 2021 bhí an méid seo a leanas:

- athbhreithniú a dhéanamh ar na córais rialaithe inmheánaigh a bhí i bhfeidhm in 2020, agus moladh dearfach a thabhairt don bhord;
- athbhreithniú a dhéanamh ar phróisis agus ar nósanna imeachta inmheánacha TFC, agus ar rialuithe slándála seachtracha TFC, agus deimhin a dhéanamh de go raibh siad stuama éifeachtach;
- athbhreithniú a dhéanamh ar na nósanna imeachta atá i bhfeidhm maidir le leanúnachas gnó agus athshlánú ó thubaiste;
- litreacha ceapacháin nua a fhorghnó i leith chomhaltaí an choiste; agus
- meastóireacht a chur i gcrích ar a fheidhmíocht féin.

Ina theannta sin, breithníonn an coiste an clár rioscaí iomlán ag gach cruinniú, agus cuireann sé moltaí faoi bhráid an phríomhoifigigh riosca agus/nó an bhoird de réir mar is iomchuí.

### Sceideal tinrimh, táill agus costais

Rinneadh mionsonraí i dtaobh na dtáill agus na gcostas a íocadh le comhaltaí a nochtadh i ráitis airgeadais an Údaráis, agus soláthraíodh don Aire iad.

### Príomhathruithe pearsanra

Is ar an mbord stiúrthóirí agus ar an bPríomhfheidhmeannach, is stiúrthóir freisin, atá an fhreagracht eisiach gníomhaíochtaí pleanála, stiúrtha agus rialaithe ÚMICÉ a dhéanamh. Leagtar amach in Aguisín 1 mionsonraí i dtaobh athruithe i gcomhaltas an bhoird.

### Nochtuithe a cheanglaítear faoin gCód Cleachtais chun Comhlachtaí Stáit a Rialú

Tá an bord freagrach as deimhin a dhéanamh de gur chomhlíon ÚMICÉ ceanglais an Chóid Cleachtais chun Comhlachtaí Stáit a Rialú (an Cód), arna fhoilsiú ag an Roinn Caiteachais Phoiblí agus Athchóirithe i mí Lúnasa 2016. Ceanglaítear na nithe seo a leanas a nochtadh faoin gCód:

- Leagtar amach i Nóta 14 de ráitis airgeadais an Údaráis anailís ar luach saothair iomlán na bhfostaithe (tuarastail agus sochair eile san áireamh, ach gan ranníocaíochtaí aoisliúntais fostóra san áireamh) ina leith siúd a thuilleann os cionn €60,000;
- Leagtar amach i Nóta 16 de ráitis airgeadais an Údaráis anailís ar thaisteal agus ar chothú;
- Leagtar amach i Nóta 17 de ráitis airgeadais an Údaráis anailís ar an gcaiteachas ar chomhairleoireacht;

- Níor thabhaigh an tÚdarás costais faoin gceannteideal ‘Costais Dlí agus Socraíochtaí’ in 2021. Baineann na costais dlí go léir a tabhaíodh le comhairle dlí ghinearálta; agus
- Leagtar amach i Nóta 18 de ráitis airgeadais an Údaráis anailís ar an gcaiteachas ar fháilteachas.

### Ráiteas comhlíontachta

Is deimhin le ÚMICÉ gur chomhlíon sé ceanglais uile an Chóid, lena n-áirítear comhlíonadh an Chóid Caiteachais Phoiblí.

## Oibleagáidí rialachais agus oibleagáidí eile atá ar an earnáil phoiblí

### Oibleagáidí dlí agus rialachais atá ar chomhlacht arna bhunú faoi reacht

Is iad an Rúnaí agus Ceann na Seirbhísí Corparáideacha, atá ina Phríomhoifigeach Riosca freisin, na príomhdhaoine a thugann cúnaimh don bhord maidir le deimhin a dhéanamh de go gcomhlíonfaidh ÚMICÉ a oibleagáidí dlí agus rialachais. I gcás inarb infheidhme, rannchuidíonn comhaltaí eile d’fhoireann ÚMICÉ mar is gá le comhlíontacht leanúnach ÚMICÉ maidir lena oibleagáidí.

### Príomhcheanglais dlí

Shainaithin agus rinne an tÚdarás na bearta is gá lena áirithiú go bhfuil a oibleagáidí dlí á gcomhlíonadh aige. Tá a príomhcheanglais dlí sainaitheanta aige mar a leanas:

- dlí na gcuideachtaí;
- an reachtaíocht sláinte agus sábháilteachta;
- an reachtaíocht fostaíochta agus reachtaíocht ghaolmhar;
- an dlí cánach, lena n-áirítear na forálacha sin a bhaineann le soláthraithe seirbhíse áirithe ag a bhfuil Deimhniú Imréitigh Cánach bailí;
- na hAchtanna Cosanta Sonraí;
- Acht na dTeangacha Oifigiúla;
- An dlí maidir le hEitic in Oifigí Poiblí; agus
- Rialacháin na gComhphobal Eorpach (Íocaíochtaí Déanacha in Idirbhearta Tráchtála), 2012.

Maidir le ceanglais áirithe eile is infheidhme de ghnáth maidir le comhlachtaí reachtúla amhail na hAchtanna um Shaoráil Faisnéise, na hAchtanna um Míchumas, an tAcht fá Choimisiún na hÉireann um Chearta an Duine agus Comhionannas agus an tAcht um Theanga Chomharthaíochta na hÉireann, níl feidhm acu maidir le ÚMICÉ de bhua nár ceapadh é chun na gcríoch sin an tráth seo.

### RGCS

Tá Oifigeach Cosanta Sonraí ag an Údarás a bhíonn ag obair leis an bPríomhfheidhmeannach chun formhaoirseacht a dhéanamh ar a oibleagáidí leanúnacha faoi RGCS.

### Nochtuithe cosanta

Comhlíonann an tÚdarás an tAcht um Nochtadh Cosanta, 2014, agus tá mionsonraí ar a shuíomh gréasáin faoi conas nochtuithe den sórt sin a dhéanamh. Áirítear tuairisceán bliantúil ÚMICÉ faoin Acht in Aguisín 6.

## Cothromaíocht inscne i gcomhaltas an bhoird

Amhail an 31 Nollaig 2021, triúr (33%) ban agus seisear (67%) fear a bhí ar an mbord, agus ní raibh aon phost folamh. Mar sin níor chomhlíon an bord sprioc an Rialtais maidir le hionadaíocht 40% ar a laghad de gach inscne ar bhoird stáit.

I bhfianaise chineál reachtúil an phróisis ceapacháin, is teoranta an tionchar atá ag ÚMICÉ ar chothromaíocht inscne a chomhaltais. Is é an tAire a dhéanann formhór na gceapachán ar bhonn ainmniúchán ó thríú páirtithe, agus níl rogha ag an Údarás ná ag an Aire maidir leis an gceist sin. De réir mar a thagann téarmaí stiúrtóirí chun deiridh, áfach, déanann ÚMICÉ aon scileanna nó taithí ar leith a d’fhéadfadh a bheith tairbhiúil a mheas, agus díríonn sé aird an Aire orthu más ann dóibh. Chun cothromaíocht inscne a chothú ar an mbord, cuireann ÚMICÉ inscne san áireamh leis an méid sin. Tar éis cuid mhór athruithe foirne a bheith ann in 2020, ba é an Cathaoirleach an t-aon chomhalta a ceapadh (athcheapadh) in 2021, agus ní bheartaítear aon duine eile a cheapadh ná a athcheapadh in 2022.

## Éagsúlacht

Rinne an bord saincheisteanna leithne na héagsúlachta a mheas, lena n-áirítear an chothromaíocht inscne agus luach na difríochta a aithint, mar chuid dá phróiseas bliantúil meastóireachta. Meascán fairsing daoine atá ar an mbord, ón earnáil phoiblí agus ón saol acadúil. Ar leibhéal eagraíochtúil, feidhmíonn na leibhéil uile faoi réir deighilt inscne 45%/55%, cé is moite de ghráid riaracháin inarb airde an sciar ban i láthair na huaire. I bhfianaise chineál an-speisialaithe a chuid oibre, is minic a fhéachann ÚMICÉ le daoine a earcú agus a choimeád ó chohórt beag gairmithe. D’ainneoin sin, tagann fostaíthe ÚMICÉ ó réimse leathan cúlraí agus is iomaí náisiúntacht a bhíonn i gceist leo.